

La ARLeF pe scuele: a cressin lis ativitâts e i progjets

A dutis lis classis, dongje dal manuâl "Anin!", l'Alfabet furlan e la mape dal Friûl. E pai insegnants un gnûf cors di formazion

A cressin i progjets e lis iniziatis pe scuele inmaneâts de ARLeF - Agjenzie regionâl pe lenghe furlane. Fra chescj, Anin!, un dai progjets in atuazion dal "Plan gjenerâl di politiche linguistiche pe lenghe furlane 2021-2025" de Regjon Autonome Friûl-Vignesie Julie.

Anin! al è il prin manuâl che al compagne i arlêfs de scuele primarie a scuvierzi la lenghe furlane, il teritori, la sô storie e la sô culture. Dal a.s. 2022/2023 indenant al è stât donât a ducj i arlêfs che i lôr gjenitôrs a vedin aderît al insegnament de lenghe furlane, cemût che al è previodût de L. 482/99 e de L.R. 29/2007. La ARLeF lu darà fûr in curt ai gnûfs iscrits dal an scolastic che al tacarà cul mês di Setembar.

Il progjet al è stât iniorât tai mêss passâts cu la consigne a 1.850 classis dai posters educatîfs di Anin!, pensâts par judâ il lavôr dai insegnants. A son stâts fats in trê versions: lis scuclis de infanzie a àn



Di çampe: Lis insegnantis di lenghe furlane Anna Zossi e Sonia Cargnelutti (Istitût Comprensîf di Tresesin) cun Eros Cisilino, president de ARLeF.

ricevût "La mê zornade", che al stice i fruts a tignî a ments i moments plui impuartants de zornade e lis ativitâts di ogni dì. L'"Alfabet de lenghe furlane" al è stât picjât tes aulis di 1° e 2° de scuele primarie,

par imparâ a lei e a scrivi l'alfabet e i digrams. Ai plui granduts de 3°, 4° e 5° classe, al è rivât invezit il poster "Friûl", une mape par cognossi trop grant che al è il Friûl, lis sôs citâts plui impuartantis e i cinc sîts UNESCO.

I posters si puedin discjamâ ancje dal sît www.arlef.it, adun cun altris materiâi e audios par studiâ la lenghe furlane e divertîsi tal stes timp.

La ARLeF e je une vore atente ancje ai insegnants di lenghe furlane. Par lôr, tai mêss passâts, al è stât pensât un percors di formazion, in colaborazion cun Docuscuele, par cognossi miôr l'implant pedagogjic e lis potenzialitâts di Anin!

E je stade une iniziative une vore preseade, che e à vût un numar alt di adesions. Chest al è stât un risultât impuartant, pussibil ancje in graciis dal coordinament fra la Agjenzie e i insegnants referents pe lenghe furlane di ogni istitût comprensîf e scuele paritarie.

Il Friûl al vinç la Europeada e al tocje il cîl de Europe

La "Selezion dal Friûl" e je la squadre che e à vinçût la "Europeada 2024", il campionât di balon des minorancis linguistichis europeanis. La cuinte edizion si è davuelte in Gjermanie dai 28 di Jugn ai 7 di Lui stâts: in finâl i fantats dai doi tecnics Mauro Lizzi e David Trangoni a àn batût la Ocitanie par 2 a 0, cui goi di Nicola Tonizzo e Francesco Costa. La partecipazion dal Friûl al torneu e je stade inmaneade de Associazion Sportive Furlane, cu la poie de Regjon Friûl-Vignesie Julie. La Europeada, nassude tal 2008, si zuie ogni cuatri agns e e je organizade de Union Federâl des Nazionalitâts Europeanis (FUEN). Al è stât un event che al à vût un grant sucès e che chest an al à tocjât numars mai regjistrâts prin, cun 24 scuadris di oms e 9 di feminis, rivant a un totâl di 900 zuiadôrs e 14 cjamps di balon, sparnicjâts te regjon transfrontaliere dal Schleswig, tra la Danimarce e la Gjermanie. Midiant de competizion sportive la Europeada e favoris il scambi culturâl fra lis minorancis e la pussibilitât di cognossisi miôr, promovint la diversitât linguistiche. Graciis ai fantats e aes fantatis che a àn puartât in alt i colôrs e la identitât culturâl dal Friûl!